

I. DISPOSICIÓN XERAIS

MINISTERIO DE AGRICULTURA, ALIMENTACIÓN E MEDIO AMBIENTE

4462 *Real decreto 295/2013, do 26 de abril, polo que se establece a composición, estrutura e funcionamento do Consello da Auga da Demarcación Hidrográfica de Ceuta.*

O artigo 26 do texto refundido da Lei de augas, aprobado polo Real decreto legislativo 1/2001, do 20 de xullo, establece que, entre os órganos de goberno, administración e cooperación do organismo de bacía, o Consello da Auga da demarcación é o órgano de participación e planificación.

Neste sentido, o artigo 35 do mesmo texto refundido regula o Consello da Auga da demarcación, coa función de fomentar a información, consulta pública e participación activa na planificación hidrolóxica nas demarcacións hidrográficas con bacías intercomunitarias.

Malia o anterior, a Demarcación Hidrográfica de Ceuta non reviste a natureza de bacía intercomunitaria; non obstante, é competencia do Estado a súa regulación e xestión, en virtude do artigo 149.3 da Constitución, ao non ser asumida a competencia polo Estatuto de autonomía da Cidade de Ceuta. Así pois, o artigo 3.7 do Real decreto 125/2007, do 2 de febreiro, polo que se fixa o ámbito territorial das demarcacións hidrográficas, identifícaa como demarcación hidrográfica. Pola súa parte, o artigo 1.6 do Real decreto 650/1987, do 8 de maio, polo que se definen os ámbitos territoriais dos organismos de bacía e dos plans hidrolóxicos, intégraa, para efectos administrativos, na Confederación Hidrográfica do Guadalquivir.

O obxecto deste real decreto é regular a composición, as funcións e atribucións e o réxime de funcionamento do Consello da Auga da Demarcación Hidrográfica de Ceuta, de conformidade co artigo 36 do texto refundido da Lei de augas.

As especificidades inherentes á Demarcación Hidrográfica de Ceuta, xa sexa tanto polo seu reducido ámbito territorial e masas de auga moi pouco significativas, case inexistentes, como pola súa escasa poboación, fan que no seu conxunto a composición do Consello da Auga prevista no texto refundido da Lei de augas se deba adaptar a estas particularidades, coa conseguinte redución do número de vogais.

Para os efectos de axilizar a constitución efectiva do Consello establécese, na disposición adicional primeira, un prazo de tres meses para a elección e designación dos vogais.

En definitiva, este real decreto establece as directrices que se deben observar para a constitución do Consello da Auga da Demarcación Hidrográfica de Ceuta, para así proceder ao cumprimento das funcións e atribucións que lle outorga o texto refundido da Lei de augas e demais normativa vixente.

Sobre este real decreto emitiu informe favorable o Pleno do Consello Nacional da Auga, no cal participan as comunidades autónomas e os sectores afectados.

Na súa virtude, por proposta do ministro de Agricultura, Alimentación e Medio Ambiente, coa aprobación previa do ministro de Facenda e Administracións Públicas, de acordo co Consello de Estado e logo de deliberación do Consello de Ministros na súa reunión do día 26 de abril de 2013,

DISPOÑO:

Artigo 1. *Obxecto.*

1. O obxecto deste real decreto é a regulación da composición, estrutura e funcionamento e atribucións do Consello da Auga da Demarcación Hidrográfica de Ceuta, conforme o previsto no artigo 36 do texto refundido da Lei de augas, aprobado polo Real decreto legislativo 1/2001, do 20 de xullo.

2. Conforme o artigo 26.3 do texto refundido da Lei de augas, o Consello da Auga é o órgano de participación e planificación da Demarcación Hidrográfica de Ceuta.

Artigo 2. *Funcións do Consello.*

1. Corresponden, con carácter xeral, ao Consello da Auga da demarcación as seguintes funcións:

- a) Promover a información, consulta e participación pública no proceso planificador.
- b) Elevar ao Goberno, a través do Ministerio de Agricultura, Alimentación e Medio Ambiente, o Plan hidrolóxico da demarcación e as súas posteriores revisións.
- c) Emitir informe sobre as cuestións de interese xeral para a demarcación.
- d) Emitir informe sobre as cuestións relativas á protección das augas e á mellor ordenación, explotación e tutela do dominio público hidráulico ou as que lle sexan encomendadas polo presidente ou a Xunta de Goberno do organismo de bacía.

2. En relación co proceso de planificación hidrolóxica serán, así mesmo, funcións específicas do Consello da Auga da demarcación:

- a) Emitir informe sobre a proposta da Xunta de Goberno de proceder á revisión do Plan hidrolóxico.
- b) Emitir informe preceptivo sobre o esquema provisional de temas importantes en materia de xestión de augas previsto no artigo 79.6 do Regulamento de planificación hidrolóxica aprobado polo Real decreto 907/2007, do 6 de xullo.
- c) Emitir informe preceptivo sobre a proposta de proxecto de Plan hidrolóxico e as súas posteriores revisións con carácter previo ao seu envío ao Goberno para a súa aprobación.
- d) Emitir informe sobre os plans especiais de actuación en situacións de alerta e eventual seca con carácter previo á súa aprobación.

3. Serán, igualmente, funcións e atribucións do Consello da Auga da demarcación as seguintes:

- a) Emitir informe sobre a delimitación dos perímetros de protección de acuíferos, con carácter previo á súa aprobación pola Xunta de Goberno.
- b) Emitir informe sobre a determinación dos perímetros de acuíferos dentro dos cales non será posible o outorgamento de novas concesións de augas subterráneas, con carácter previo á súa aprobación.
- c) Emitir informe acerca das modificacións sobre a largura das zonas de servidume e de policía, do dominio público hidráulico, con carácter previo á súa aprobación pola Xunta de Goberno.
- d) Calquera outra que lle sexa legalmente atribuída.

Artigo 3. *Estrutura.*

1. O Consello da Auga da Demarcación poderá actuar en pleno e en comisións.
2. O Pleno poderá acordar a constitución de comisións específicas para o estudo e informe dos asuntos que aquel decida encomendarlle.
3. Existirá, en todo caso, unha Comisión de Planificación Hidrolóxica e Participación Cidadá para o estudo e informe dos asuntos que o Pleno decida encomendarlle en

relación coa planificación hidrolóxica e a participación cidadá, cuxa composición se establece no artigo 7.

Artigo 4. *Composición do Pleno.*

1. O Consello da Auga da Demarcación Hidrográfica de Ceuta estará constituído polo presidente, dous vicepresidentes, un secretario e os vogais que se concretan no artigo seguinte.

2. Será presidente do Consello o da Confederación Hidrográfica do Guadalquivir. En caso de vacante, ausencia, enfermidade ou outra causa legal, será substituído polo comisario de Augas da citada confederación.

3. A Vicepresidencia Primeira corresponderá ao vogal que resulte elixido por e entre os representantes da Cidade de Ceuta. A Vicepresidencia Segunda recaerá sobre o vogal que resulte elixido por e entre os vogais representantes dos usuarios. En ambas as situacións o cesamento como vogal implicará, en todo caso, o cesamento como vicepresidente.

4. Como secretario do Consello, con voz pero sen voto, actuará o secretario xeral da Confederación Hidrográfica do Guadalquivir. En caso de vacante, enfermidade ou outra causa legal, será substituído por un funcionario do organismo de bacía designado polo presidente.

Artigo 5. *Distribución de vogais.*

En función dos criterios que recolle o artigo 36.1 do texto refundido da Lei de augas, serán vogais do Consello da Auga da demarcación:

a) En representación dos departamentos ministeriais relacionados coa xestión das augas e o uso dos recursos hidráulicos, os seguintes vogais: Agricultura, Alimentación e Medio Ambiente, un vogal; Asuntos Exteriores e de Cooperación, un vogal, e Defensa, un vogal.

b) En representación dos servizos técnicos do organismo de bacía, o xefe de zona da Confederación e o xefe da Oficina de Planificación Hidrolóxica; da Dirección Xeral de Sustentabilidade da Costa e do Mar, do Ministerio de Agricultura, Alimentación e Medio Ambiente, un vogal; da Capitanía Marítima de Ceuta, un vogal, e da Autoridade Portuaria de Ceuta, un vogal.

c) En representación da Cidade de Ceuta, tres vogais.

d) En representación dos usuarios, sete vogais.

e) En representación das asociacións e organizacións de defensa de intereses ambientais, económicos e sociais relacionadas coa auga, tres vogais coa seguinte distribución: asociacións ecoloxistas, un vogal; asociacións empresariais, un vogal, e organizacións sindicais, un vogal.

Artigo 6. *Designación dos vogais.*

1. A designación de vogais do Consello da Auga da demarcación efectuarase do modo seguinte:

a) Os vogais en representación dos departamentos ministeriais e da Dirección Xeral de Sustentabilidade da Costa e do Mar serán designados polo titular do ministerio correspondente. A capitanía marítima estará representada polo seu titular. O vogal en representación da autoridade portuaria será designado polo seu respectivo consello de administración.

b) Os vogais en representación da Cidade de Ceuta serán designados polo seu consello de goberno.

c) Os vogais en representación dos usuarios serán elixidos, por un período de tres anos, en primeira instancia, entre os membros representantes de Ceuta da Asemblea de Usuarios da Confederación Hidrográfica do Guadalquivir, por eles mesmos en cada unha

das clases de aproveitamentos, respectando a proporcionalidade existente na asemblea. Para o caso en que o número de representantes de Ceuta na dita asemblea non fose suficiente segundo o fixado no artigo 5.d), os restantes serán elixidos polo presidente do Consello entre os usuarios de cada clase con dereitos inscritos que teñan unha representación significativa e proporcional ao caudal utilizado.

d) Os vogais en representación das asociacións e organizacións de defensa de intereses ambientais, económicos e sociais serán designados, por un período de tres anos, polo titular do Ministerio de Agricultura, Alimentación e Medio Ambiente, por proposta das asociacións e organizacións con maior implantación ou máis representativas na Demarcación Hidrográfica.

2. Dadas as particularidades desta demarcación, un mesmo vogal poderá representar máis dun membro das entidades que contan con representación no Consello e, en tal caso, terá tantos votos como membros represente.

Para cada un dos vogais do Consello poderase designar un suplente na mesma forma que o titular.

Artigo 7. *Composición da Comisión de Planificación Hidrolóxica e Participación Cidadá.*

1. A Comisión de Planificación Hidrolóxica e Participación Cidadá estará presidida polo presidente do Consello da Auga da demarcación e integrada por vogais do dito consello, na seguinte forma: un polo Ministerio de Agricultura, Alimentación e Medio Ambiente; un polo Ministerio de Asuntos Exteriores e de Cooperación, e un polo Ministerio de Defensa; pola Cidade de Ceuta, tres; seis dos usuarios, e tres representantes das asociacións e organizacións de defensa de intereses ambientais, económicos e sociais relacionados coa auga, distribuídos da seguinte maneira: un representando os intereses ambientais, un os económicos e un os sociais.

2. A elección do representante de cada grupo farase entre os seus membros e por un período de tres anos. Ademais, integrarase na Comisión o xefe de zona da Confederación Hidrográfica do Guadalquivir. Como secretario da comisión actuará o xefe da Oficina de Planificación Hidrolóxica da Confederación Hidrográfica do Guadalquivir, con voz e voto.

Artigo 8. *Réxime de funcionamento.*

1. O Consello da Auga da demarcación poderá elaborar un regulamento de réxime interior que regule o seu funcionamento e que deberá ser aprobado polo Pleno.

2. Sen prexuízo das peculiaridades previstas neste real decreto, o Consello axustará o seu funcionamento ao disposto no capítulo II do título II da Lei 30/1992, do 26 de novembro, de réxime xurídico das administracións públicas e do procedemento administrativo común, para o funcionamento dos órganos colexiados.

3. En canto ao réxime de convocatorias, observaranse os seguintes criterios:

a) O Pleno do Consello reunirse cando o considere necesario o presidente e, en todo caso, polo menos unha vez ao ano.

b) Se nunha convocatoria non estivesen presentes a metade dos seus membros, o presidente ordenará unha segunda convocatoria na cal será suficiente a asistencia dun terzo dos membros do Consello, xa sexa constituído en pleno ou en comisión.

4. Non obstante o previsto no número anterior, o presidente poderá someter un asunto determinado á consideración do Consello solicitando as observacións dos seus membros á cuestión mediante procedemento escrito, sen necesidade de celebración do Pleno do Consello ou das súas comisións, por razóns de urxencia. Non se poderá utilizar este procedemento cando se trate da discusión e informe do Plan hidrolóxico de bacía, salvo que xa se debatesese con anterioridade en pleno ou supoña modificacións non relevantes. Unha vez iniciado o dito procedemento, o Pleno do Consello ou as súas

comisións deberanse pronunciar nun prazo non superior a un mes e, transcorrido ese prazo, entenderase substanciado o mencionado trámite.

5. Ás sesións das comisións do Consello da Auga da Demarcación poderán asistir, cando así o acorde o presidente do Consello, funcionarios do organismo de bacía ou da Cidade de Ceuta, así como representantes das organizacións agrarias e de usuarios non concesionais ou outras persoas de recoñecido prestixio e experiencia en materia de augas, con voz pero sen voto, cuxa asistencia será voluntaria e sen remuneración ningunha.

6. Os asuntos que se deban someter ao Consello da Auga da demarcación serán preparados pola Xunta de Goberno da Confederación Hidrográfica do Guadalquivir.

7. Para todos os acordos do Pleno, así como para as distintas eleccións, aplicarase o principio de maioría. En caso de empate ou de non chegar a acordo, resolverá o presidente do Consello.

8. En casos de ausencia ou de enfermidade e, en xeral, cando conorra algunha causa xustificada, as organizacións representativas de intereses sociais e demais membros do Consello poderán substituír os seus membros titulares por outros, acreditándoo ante a Secretaría do Consello.

Artigo 9. *Órganos de apoio.*

O órgano de apoio técnico do Consello da Auga da demarcación será a Oficina de Planificación Hidrolóxica da Confederación Hidrográfica do Guadalquivir.

Disposición adicional primeira. *Constitución do Consello da Auga da demarcación.*

O Ministerio de Agricultura, Alimentación e Medio Ambiente, a través da Confederación Hidrográfica do Guadalquivir, levará a cabo as actuacións necesarias para que o Consello da Auga da demarcación se constitúa no prazo de tres meses a partir da entrada en vigor deste real decreto.

Disposición adicional segunda. *Constitución da Comisión de Planificación Hidrolóxica e Participación Cidadá.*

Tras a constitución do Consello, a Comisión de Planificación Hidrolóxica e Participación Cidadá deberase constituír nun prazo non superior a un mes.

Disposición adicional terceira. *Réxime económico.*

A constitución e funcionamento de Consello da Auga da demarcación regulado neste real decreto non suporá incremento ningún do gasto público e atenderase cos recursos persoais e materiais existentes na Confederación Hidrográfica do Guadalquivir.

Disposición derradeira única. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 26 de abril de 2013.

JUAN CARLOS R.

O ministro de Agricultura, Alimentación e Medio Ambiente,
MIGUEL ARIAS CAÑETE